

Arubianonan cu 'politiek café' na Tilburg

ORANJESTAD - Den cuadro di e próximo eleccion na Hulanda e organizacion Arubano di Tilburg "Nos Baranca" a organizá un 'politiek café', cu e tema: "Arubianonan di Tilburg tambe ta conta!"

Esaki ta algo di admirá ya cu e organizacionnan Arubiano na Hulanda ainda ta promoviendo nan reconocimiento. Pa logra e reconocimiento aki ta di sumo importancia pa nos integrá den e comunidad Hulandes, pero manteniendo nos propio identidad. Ta bon tambe pa ta na altura di desarroyonan unda nos ta biba, mescos tambe cu e desarroyonan político riba nivel nacional. Contacto cu e politiconan Hulandes ta haci cu nos tambe por tin algo di bisa den e comunidad y den e decisionnan cu ta afectá nos Arubianonan bibá na Hulanda.

E intencion di e atardi aki, organizá pa e Comision di Charla tabata pa duna informacion p'asina contribuí na un formacion político pa e miembronan di "Nos Baranca".

Ministro Plenipotenciario di Aruba, drs. C.A.S.D. Wever a presenciá e forum aki na unda el a hiba palabra.

Den su discurso el a enfatizá e integracion di e Arubiano-



Ministro Plenipotenciario drs. Booshi Wever tambe a tene un discurso na Tilburg durante e politiek café

nan den comunidad Hulandes y na unda el a muestra riba e importancia di tolerancia di parti di e comunidad di Tilburg. Sr. Wever a duna ehempel di e incidente na unda cu un famia Antiyano a ser discriminá di tal manera cu nan no a ser permití pa biba den un barrio na Tilburg. El a haci un apelacion na esnan representando e diferente partidonan político pa nan scucha e voz di e Arubianonan na Tilburg.

Despues a sigui un atardi hopi informativo, caminda tur e

partidonan politico a haña e oportunidad di introduci nan programa na esnan presente. Representantenan di CDA, PvdA, VVD, D'66, SP, ABT, GL, y di SW '86 tabata presente.

Un panel cu a consistí di srs. Juan Thijsen, Sr. John Boekhoudt y Sra. Anicia Leonard a haci varios pregunta na e miembronan di e diferente partidonan.

Un debate abierto a ser tení na unda cu personanan den público tambe por a trece nan punto y preguntanan padilanti. ■